

داز اولدوزو

گونئی آذربایجان میلی حرکتی نین اساس لاری



بویازی گونئی آذربایجان میلی حرکتی نه، خصوصاً ایچهری ده وطن-میللت
آدینا وار گوجو ایله مجادله ائدن قهرمان لاریمیزا تقدیم اولونور.
متن و باشلیغی ده بییش مه دن، هر جور دیجیتال و چاپی شکل ده
یابین لان ماسی و پایلاشیمی سربست دیر.

ایلقار اولوسوی

01/02/2025

فهرست

- 1 گیریش
- 4 هدف
- 5 تک آماج: گونئی آذربایجانین میلی دولتی
- 6 میلی دولت نه دیر؟
- 7 اولوسلار آراسی حقوق دا میلی دولت
- 9 هدف دن جایما ماق
- 11 ایلکه لر
- 12 گونئی آذربایجان میلی حرکتی نین ایلکه لری
- 14 تورک چولوک
- 16 آذربایجان چی لیق
- 18 اؤزگورلوک چولوک
- 20 عدالت چی لیک
- 22 اخلاق چی لیق
- 24 خالق چی لیق
- 26 یئنی لیک چی لیک
- 28 تشکیلات چی لیق
- 30 استراتژی
- 31 استراتژی نه دیر
- 31 پلان و تاکتیک
- 32 مجادله استراتژی سی

گيريش

گونئی آذربایجان، تاریخین هر چاغیندا اؤز میلی دولتی سایه سینده آلی آچیق بیر میلیت اولاراق وار اولوبدور. آذربایجان تورک لری هر زامان انسانی ده یرلر، اؤزگورلوکلر و عدالتلی حاکمیت قونوسوندا بؤلگه نین اؤنجو میلیتی و قونشولاری اوچون ایشیق و اومود قاینای ایلوب دور. آنجاق سون یوز ایل ده، گونئی آذربایجانین دولتینین، ایران دولت چیلیغی آدینا غصب اندیلیب، استثمار اولون ماسی، میلیتیمیزه بؤیوک ضررلر وئرمیش، میلی ثروت لرنی تالان ائتمیش و گون دن گونه مادی و معنوی باخیمدان یوخسول لوغا و فلاکت سوروکلهمیش دیر. عینی زامان دا آذربایجان تورک لرنین عدالتلی و انسان سئوهر دولت چیلیغی نین یوخ اولماسی، بولگه نین باشقا خالق لارینین دا اومود و ایشیغینین سؤنمه سینه سبب اولموشدور. نئجه کی یوز ایل دیر، اونلار دا بیزیم کیمی ساواشلار، عدالت سیزلیکلر و ظلم آلتیندا ازیلیب، دنیا مدنیتیندن، رفاه دان و شرفلی یاشام حقیندن، چوخ اوزاق لاشمیش لار.

فارس فاشیزمی و امپریالیست گوجلرین تورک دشمن لی یی و بعضی گونئی آذربایجان لی آیدین لارین گنچمیشده کی یانلیش حرکت و دوشونجه لری، گونئی آذربایجانین فلاکتینین ان اؤنملی سبب لریندن دیر. گنچمیش یوز ایلین تجربه سینه باخدیغیمیزدا، آیدین لاریمیزین داها اونجه گتتدیک لری یوللارین چوخونون یانلیش نتیجه لره سبب اولدوغونو گؤره بیلیریک. ایران آدینا و ایرانین دموکراتیک لشمه سی یولوندا وئرین مجادله و فداکارلیق لارین هامیسی، گونئی آذربایجان خالقینین، خوشبخت لیغی یئرینه فلاکتینه سبب اولموشدور. او فلاکت لره سبب اولان یانلیش دوشونجه و پلان لار ایله دوام ائده رک، او فلاکت لردن قورتولماق اولماز. بونا گؤره ده، بوگون گونئی آذربایجان میلی حرکتینین هدفی، ایران حکومتینی ده بیشدیریپ باشقا بیر حکومت قورماق یئرینه، یالنیز و یالنیز اؤز میلی دولتیمیزی یئنین قورماق اولموشدور.

دولتیمیزی اشغال اندیب، بیزی بوتون امکان لاردان محروم ائتسه لر ده، بیر مللت اولاراق وار اولماغا دوام اندیب، هر فرصته، میلی دولتیمیزی یئنی دن قورماغا چالیشمیشیق. حتی سیاسی، اجتماعی و بین الملل ساحه لرده، اؤزوموزو قورتاراجاق یئنی امکانلار دا یاراتمیشیق.

بوگون بو امکانلار سایه‌سین‌ده، گونئی آذربایجان میلی حرکتی، یعنی میلیتیمیزین قورتولوش ساواشی، هر زامان کین‌دن ده‌ا چوخ باشاریا یاخیندیر، چونکو:

- میلی حرکتیمیز، مدنی و ادبی ساحه‌لردن باشلاسا دا، بو گون میلیتیمیزین اوپانیسی سایه‌سن‌ده، سیاسی و میلی بیر دیرنیش و مجادله‌یه چئویریلیب، اولوسلار آراسی سیاسته داشینیبدیر.
- گونئی آذربایجان خالقینین چوخو، اؤزل مدنیته صاحب اولدوغونو آنلاییب و صاحب اولدوغو مدنیته و وطن‌ده، مستقیل‌لی‌یه لایق بیر میلیت اولدوغو قناعت و سیاسی شعورونا یئتیشیب‌دیر.
- آرتیق گونئی آذربایجان اؤز تورکلویونه ساریلیر. بوگون تورکچولویون چیرپینان اورگی تبریزدیر، گونئی آذربایجان‌دیر.
- گونئی آذربایجان‌دا چوخلو ساییدا میلی دوشونور و آیدین یئتیشیب‌دیر. اونلارین چوخو گونئی آذربایجاندا یاشاییر و میلی حرکتیمیزه یؤن وئیریر. عینی زاماندا دونیانین دؤرت بیر یانیندا، دوشونجه مرکز‌لرینده یئر آلیب، میلی حرکتیمیزین نظری اساسلارینی درین لشدیریب، اولوسلار آراسی سیاسته داخل ائدییرلر.
- آرتیق گونئی آذربایجان ایران چی لیک و ایران دولتچیلی یینی منیم‌سه‌میر و اونو اؤز دولتی کیمین قبول ائتمیر. ملتیمیز فیکیرده و دوشونجه‌ده، ایران دولتچیلی ییندن قوپوب، اؤز سرنوشتینی تورکلوک و تورک دونیاسیندا گؤرور.
- آرتیق میلی مجادله‌میزین بایراگی تثبیت اولونوب، گونئی آذربایجان میلی فعال‌لارینین چوغونلوقو اونو قبول ائدیب و ملتیمیز طرفیندن قبول ائدیلیر.

- ایران دولتیچیلییی ان گوجسوز دؤنمینده دیر. ایچریده خالق طرفیندن دستهیینی و ایدئولوژیک باغینی ایتیریپ، دنیادا ایسه مشروعیتمیز بیر تروریست دولتی استاتوسوندا دیر. عینی زماندا تحریملر، مالی و عسگری گوجونو ضعیفله دیب دیر.

- قوزئی آذربایجان جمهوریتینین باشاریلاری بیر اؤرنک کیمی گؤزلر اؤنونده دیر و ملتیمیز آذربایجان تورک دولتی آلتیندا داها مرفه، داها اؤزگور و داها گوجلو اولاجاغینا اینانیر.

- تورک دونیاسینین بیرلشمه سی و گؤجله نمه سی و تورک دولتلری تشکیلاتینین قورولوشو، میللتیمیزه گووه ن وئریر و آیدن گلجه یه اومودلان دیریپ هوس لن دیریپ.

بو سببلره گوره، داها ائتکیلی، جسارتلی و یئر باسان آدیم لارلا، استراتژی و یول خریتمیزی بلیرلهیپ، ان قیسیسا زاماندا گونئی آذربایجان قورتاریپ، میلی دولتیمیزی قورمالیق. یول خریتمیزی بلیرلهمک اوچون، اورتاق هدفیمیز و ایلکه لریمیز شفاف شکیلده معین اولمالیدیر. هدفیمیز و ایلکه لریمیز معین اولماسا، هیچ بیر فرصتی دوزگون ده یرلندیره بیلمه یه جه ییک و هارا گنده جه یینی بیلمه یین بیلمه یین بیلمه یین بیلمه یین بیلمه یین فایداسی اولمایاجاق. هدفسوز و ویزونسوز بیر مجادله، بوشونا زامان گئچیرمک دیر، ائیلیم سیز و حرکتسوز دوشونجه ایسه یالینیز بیر آرزو و خیال دیر. اورتاق هدفیمیز بللی اولورسا اونا چاتماق اوچون اورتاق استراتژی لر و تاکتیک لر ی پلانلایب، ویزونلو بیر شکیلده حرکت گنچیب، دنیانی ده بییش دیره بیلریک.

استراتژی لر هدفه چاتماغین یولو و روتاسی دیر، ایلکه لر ایسه دوغرو یولدا اولدوغوموزو گؤسترن ایشیق لاردیر. هدفیمیزه چاتماق اوچون، روتامیز (استراتژی لریمیز) وارسا، دوغرو یؤن ده ایلرله مک و یولدان ساپماماق اوچون، یولوموزو ایشیق لاندیران دیز فیری، قطب نما، رادار و اولدوزلارا، یعنی ایلکه لره احتیاجیمیز واردیر.

هدف

تک آماج: گونئی آذربایجانین میلی دولتی

دولت قورماق انسانلیغین ان بویوک باشاریسی، تورک نؤره و عنعنه لرینین تملی دیر. دولت، بیر یورد و وطن ده یاشایان انسان لارین ان اوست اداره ائتمه وسیله سی دیر. بیر توپلومو بیرلشدیریب، میللت ائدن سؤزلشمه و مکانیزمین آدیدیر. دولت، بللی بیر وطنده، میللتین سیاسی بیرلی یین دن دوغان حقوقی بیر وارلیق دیر، یعنی میللتین اراده سینین تجلی سیدیر. توپلومو تمثیل ائدن بیر دولت وارسا انسانلار بیز اولار، یعنی میللت اولار، یوخسا بیریریندن آیری قالیب، باشقا میللت لرین آیاقلاری آلتیندا یوخ اولار. میلی دولت اولماسا، میلی بیرلیک ده اولاماز، میلی بیرلی یی اولمایان توپلومون دا فاعلیت قابلیتی اولاماز.

گونئی آذربایجان تورکلرینین، سوسیال و اقتصادی ساحه لرده آزادلیغی و گلیشمه سی اوچون، اؤنجه گونئی آذربایجانین اؤزو آزاد اولوب، میلی دولتی قورمالی دیر. محکوم میللتین اختیاری هیچ وقت اؤزونده اولماز. اونون طالعینی حاکیم میللت لرین نمایندنده لری تعیین ائدر، اونلار دا، اؤز میللت لرینین چیخارلارینی گوده ر. یعنی میلی دولتی اولمایان بیر خالقین سوسیال آزادلیغی، دموکراسیه چاتماسی و اقتصادی گلیشمه سی امکان سیزدیر. بیز دولت سیز قالدیغیمیز سون یوز ایله ده، یاشادیغیمیز بؤیوک فلاکت لر، دردر، حقارت لر و عدالت سیزلیک لرین، دولت سیزلیک دن باشیمیزا گلدی یینی آنالیب، درسیمیزی آلمیشیق. و بیلیرک کی بیر میللتین آزادلیغینی قورویا بیله جک تک گوج، اونون میلی دولتی دیر. اونا گوره دیر کی، بو فلاکت لر دن قورتولوب، مرفه، اؤزگور و شرفلی یاشاماق اوچون، بیزی تمثیل ائدن و بیزی ائدن بیر میلی دولت ایسته ییریک. شبهه سیز، وطنیمیز آذربایجان اوچون، میللتیمیزین رفاهی و خوشبختلیغی اوچون، حیاتییمیز، ناموسوموز، شرفیمیز، گه له جه ییمیز و ایناندیغیمیز مقدس لریمیز اوچون یعنی هر شئی ییمیز اوچون، بوتون دویغولاریمیزلا، آییق لیغیمیزلا و گوجوموزله، گونئی آذربایجان میلی دولتی قوروب قوروماق اوچون مجادله ائدیریک و ائده جه ییک. بونو دا بیر سئچیم کیمی ده ییل، انسانلیق وظیفه میز بیلیریک. بو وظیفه میزی یئرینه یئتیرمک اوچون، ایله کله ر و استراتژی لریمیزی دقت له بلیرله ییب، تک هدفیمیز یعنی میلی دولتی میزی قورماق اوچون مبارزه ائتمه لی ییک. بیزیم اوچون ان بؤیوک تهله ک، هدفیمیزین چوخ یوکسک یعنی تام باغیمسیز بیر میلی دولت اولماسی و اونون اوچون چیرپینماق ده ییل، هدفیمیزین چوخ آشاغی و کیچیک چخارلار اولماسی دیر.

ایچیمیزده بؤیوک هدف یوخسا، دنیاین بیزه وئره بیله جهیی هیچ بیر شئی یوخدور. بؤیوک هدفیمیز اولسا و اونا ایسرار ائتدیب اونون اوچون مبارزه ائتسک، امکانشیزلار ممکن، ممکن لر محتمل و محتمل لر قطعی اولاجاق.

میللی دولت نه دیر؟

میللی دولت بیر میللتین بیرلی بی نین و اراده سینین تجلی سی دیر. میللی دولت بیر میللتین یاشاماغی و وار اولماسی اوچون ان بؤیوک ثروتی دیر. باشقا ملت لرین استثماری آلتیندا اولان بیر میللت، یالیز استثماردان قورتولوب، اوز میللی دولتی نی قوراراق، ان یوکسک خیری، ان یوکسک کمالی و ان یوکسک سعادت یی اده ائده بیلر. میللی دولت ائله بیر ایشیق دیر کی انون قارشیسندا زنجیرلر اریهر، تاج و تختلر یانار و میللتین اسارتی اوچون قورولموش بوتون قورولوش لار ییخیلار. میللی دولت توپلومو میللت ائدر، میللت ده اونو دولت ائدر، بیرینین وارلیغی اوچون اوبیرینین اولماغی شرط دیر.

انسان توپلوملاری دولت اوتوریته سی اولمادان یاشایا بیل مز. توپلومدا اؤزگورلوغون، برابرلیغین و عدالتین ساغلانماسی و قورونماسی، آنجاق و آنجاق میللی دولتین قورولماسی و میللی ائگمن لی بین تامین ائدیلمه سی ایله ممکن دور. بیر دولت، قانون لارینی و طرح لارینی اجرا ائتمک اوچون، داخلی و خارجی اوتوریته یه و ائگمن لیغه صاحب اولار. داخلی ائگمن لیغه صاحب اولان بیر دولتین، یالیز اؤز تورپاقلاری و وطن داشلاری ایچینده اوتوریته سی اولار. یعنی اؤز تورپاقلاری ایچینده، قرارلر آلیب، باشقا بیر دولت یا دا قورولوشون اجازه سینه احتیاج اولمادان اجرا ائده بیلر. خارجی یا دا مللی ائگمن لیک ایسه، بیر دولتین اولوسلار آراسینداکی یشری و مستقل بیر وارلیق اولاراق فعالیت ائتمه سین یی ساغلار. مستقل و ائگمن دولت، یالیز خارجی ائگمن لی بین یی قازانمیش بیر دولت دیر.

ان بویوک شرف تام باغیمسزلیق و استقلال اولسا دا، میللی فعاللاریمیزین بیر قیسمی، گونئی آذربایجان میللی دولتی اوچون، بعضی سیستم لره اولدوغو کیمی، داخلی ائگمن لی بین یئترلی و ال چاتان اولدوغونو دوشونورلر. آنجاق میللی فعاللارین چوغونلوغو، گونئی آذربایجان و دنیا داکی وضعیت و باشقا تجربه لره دایاناراق، تک قورتولوش یولوموزو، تام مستقل و ائگمن بیر گونئی آذربایجان دولتینده گؤرورلر. بو دوشونجه لرین ایکسی ده، آذربایجان مرکزی اولدوقجا، میللی حرکتیمیزین ایچینده و تک آماجیمیزین

دوغرولتوسوندادير. آما گونئی آذربایجان یئرینه ایران مرکزی دوشونولورسه، یعنی ایرانی فئدرال، کونفئدرال ویا داها دموکراتیک بیر دولته چنوریمک کیمی بیر آماج وارسا، اونا گونئی آذربایجان میلی حرکتی دئییلمز. گونئی آذربایجان میلی حرکتینین ایران و ایراندا یاشایان باشقا میلیتلرین سرنوشتینی تعیین ائتمک کیمی بیر هدفی یوخدور. ذاتا بونا نه حقی واردیر نه ده گؤجو یئتر. میلی حرکتیمیزین آماجی گونئی آذربایجان دولتینی قورماقدیر، ایستر ایرانین قالانی پارچالانسین، فدرال اولسون، اولدوغو کیمی قالسین، داها پیس اولسون یا دا داها یاخشی اولسون. بونلارین هیچ بیر، آماجیمیزی ائتکیله مز و ده بیشدیرمز. البته بو، گونئی آذربایجانین بؤلگه خالقلارین دان آیریلماق ایسته دیغی آنلامینا گلمز. بیز بؤلگیمیزده کی بوتون خالقلار ایله باریش ایچینده، آزاد و برابر یاشاییب، دایانیشماق ایسته بیریک. بو دا، داها ساغلام بیر پلاتفرم دا، یعنی بیزی تمثیل ائدن گونئی آذربایجان دولتی سایه سینده اولا بیلر. بوگون، قاشقایلار، خوراسان تورکلری و ترکمنلر کیمی دوغما قارداشلاریمیزلا برابر، قونشولاریمیز اولان کوردلر، لورلار، عربلر، گیلکلر و حتی فارسلا رلا بیرگه، ایران آدلانان اؤلکه نین فرقلی زیندانلاریندا محبوسوق. بو زیندان لاردان قورتولماق هرکسین حقی دیر. آنجاق بیز زیناندا اولدوقجا، نه باشقا زیندانلاردا کی قارداشلاریمیزی و قونشولاریمیزی قورتارا بیله ریک، نه ده اونلارا بیر فایدامیز اولا بیلر. اؤنجه اؤزوموزو قورتارمالیق کی قارداش و قونشو خالقلارا دا، یاردیم الیمیز و گوجوموز اولسون.

اولوسلار آراسی حقوق دا میلی دولت

گونئی آذربایجان میلی حرکتی نین اساس ایسته بی، غصب اولونموش و استثمار اولونموش دولت چیلی یینی گئری آلماق دیر. بیزیم هیچ کیمین وطنینده یا دا دولتینده گؤزوموز یوخدور. بیز، مین ایل لردیر بابالاریمیزین اداره ائندی بی، آما سون یوز ایل ده غصب اولونموش اؤز دولتیمیزی یئنی دن قورماق ایسته بیریک. سیاسی باغیمسیزلیق ایسته بییمیزین مشروعیتینین آنا قاینایغی دا بودور. بونون لا برابر، گونئی آذربایجان میلیتلی دموکراتیک حق لره دایاناراق، اؤز سرنوشتینی تعیین ائتمه حقیقه ده صاحب دیر. عینی زاماندا یوز ایلدیر گونئی آذربایجان تورکلری، ایران دولتی چرچیوه سینده، دموکراتیک و میلی حق لرینین تامین اولماسی اوچون، دواملی مجادله ائیدیدیر. آما بوتون ایران حاکمیتلری، بو باریشچیل و

دموکراتیک ایستکلره قارشی، آمانسیز و نسبت سیز شدت، جنایت و قتل عام لار ائدیلمر. آرتیق ایران دولتی چرچیوه سینده، گوئی آذربایجانین دموکراتیک حقلرینین تامین اولونماسینین امکانسیز اولدوغو، اثبات اولوب دور. بونا گؤره ده، گوئی آذربایجانین، سیاسی مستقل لیکدن باشقا بیر یولو قالمایب دیر. ایران دولتینین آذربایجانا قارشی قتل عام لار و انسانلیق دان کنار جنایت لری و ملتیمیزین یوز ایلیک مجادله سی، حرکتیمیزین دیگر مشروعیت قاینایب دیر.

بیر میلی حرکت، میلی مجادله ائدیب، میلی دولتینی قورار، سونرا مستقل لیک اعلانی و باشقا اولکه لرین رسمیته تاینماسی ایله سون هدفینه چاتار. بو مرحله لرین هر بیرینین فرقی استراتژی لری و حقوق لاری واردیر.

- میلی مبارزه و قورتولوش ساواشی هر میللتین انسانی حقی دیر و دونیانین بوتون آزاده انسانلاری، قورتولوش مجادله سی ائدن مباریزلره سایقی گؤسترر. ترور و انسانلیق جنایت لره قاریشمادان، هر جور سیلاحسیز و یا سیلاحلی قورتولوش ساواشی، بوتون اولوسلار آراسی قورولوشلاردا و حقوق دا، قبول ائدیل میس بیر حقدیر.

- اؤزونو تمثیل ائدن میلی حکومتینی قوروب، اداره سینی اؤز الینه گنجیریب، اؤز تورپاقلاریندا انکمن لی یینی تامین ائتمک، بیر میللتین ان دموکراتیک حقی دیر و اؤز سرنوشتینی تعیین ائتمه حقینین ان اساس تجلی سی دیر. اؤز تورپاقلاریندا اتوریته سینی تامین ائتمیش و وطن داشلارینین انسانی حقوقلارینا حرمت لی بیر میلی حکومت، مستقل لیک اعلان ائتمه ده- ائتمه سه ده، باشقا اولکه لر طرفیندن رسمیته تاینسا دا- تاینماسا دا، اولوسلار آراسی حقوق دا، بیر دولت حقوقونا مالیک دیر.

- هر دولت، میلی مجلس و میللتین اونایی ایله مستقل لیک اعلان ائتمه حقیقه صاحب دیر

- مستقل لیک اعلان ائتمیش بیر دولت، فرقلی شرطلرده، باشقا اؤلکه لر و تشکیلاتلار طرفیندن رسمیته تانینا بیلر. اولوسلار آراسی حقوق دا، بو موضوع دا هر نه قدر بلیرسیزلیق و مباحثه اولسا دا، بیر اؤلکه نین باشقا اؤلکه یی رسمیته تانینما موضوع سو، تماما رئال پولیتیک ایله ایلگیلی دیر. گونئی آذربایجانین مدرن و گلیشمیش مدنیتی، انسانی گوجو، زنگین جغرافیاسی، ژئوپولیتیک موقعیتی و قارداش اؤلکه لرین دستک لری، بو مرحله دن ده گنچه بیله جک پتانسیلین ضمانتی دیر.

بیز گونئی آذربایجان میلی حرکتی اولراق بیرینجی مرحله، یعنی میلی مجادله و قورتولوش ساواشی مرحله سینده بیک. بوگون، تک هدفیمیز بیر سونراکی مرحله یه یئتیشمک، یعنی میلی دولتیمیزی قورماقدیر. بوتون مجادله و انرژی میزی، اونا صرف ائتمه لی بیک. بوتون استراتژی و تاکتیک لری میز، بیزی اونا دوغرو بیر آدیم آپارمالیدیر.

هدف دن جایماق

موجداله سیراسیندا گونده لیک اولایلارلا قاپیلیب تک آماجی میزی اونوتمالی ییق. میلی حرکتین هدفی، گونئی آذربایجان دولتی نی یئندن قورماقدیر. آندیغیمیز هر آدیم و سؤیله دیغیمیز هر سؤز، بیزی بو هدفه یاخینلاشدیرمالیدیر. گونئی آذربایجان میلی حرکتی، ایران رژیمین ایچریده و دیشاردا اولان اوپوزیسیونو ایله عینی هدفی گودمور. اونلار ایران و ایران دولت چیلی یینی قوروپوب، داها گوجلو ائتمک اوچون، رژیمین ده بییش مه سینی ایسته ییرلر. اونلار یالنیز حکومته قارشیدیرلار، ایرانچیلیک و فارس فاشیزمین ده ییل. میلی حرکتیمیز ایسه، بو عدالتسزلیک لر و فلاکتین سببینی، ایلك باش دا، ایران دولت چیلی یی و اونون قورولوش فلسفه سی اولان فارس فاشیزمین ده، آردیندان دا بو گون فاشیزمین تمثیلی اولان جمهوری اسلامی ده گؤرور. بیزیم دشمنیمیز، ایران دولتی نین تامامی دیر و گونئی آذربایجانین تک قورتولوش یولو، ایران دولتی نین قورتولوب اؤز دولتی نی قورماقدان گنچر. ائله بونا گؤره دیر کی ایرانا حاکیم اولان هر هانسی بیر حکومت، نه قدر گوجسوز، باجاریقسز و مشروعیت سیز اولسا، بیر او قدر یاخشی دیر و گونئی آذربایجان میلی حرکتینین اوغورو و میلی دولتیمیزین قورلماسی نین هزینه سی ده او قدر آز اولار. ایرانا حاکم اولان رژیمین بیخیلماسی یا دا ده بییش مه سی، تک باشینا بیزی فلاکت دن قورتارماز. اونون یئرینه گلن هر

حکومت، یئنه ده ایران چی لایق فاشیزمی ایله، آذربایجانلی ازمهیه چالیشیب، اوندان داها فاشیست و عدالتسیز اولا بیلر.

گونئی آذربایجانلی، میلی دولته لایق بیر میللت کیمی قبول ائتمه یین اوپوزیسیون تشکیلاتلاری و باشچی لاری ایله اورتاق پلان قوروب، برابر حرکت ائتمک معناسیزدیر و میلی حرکتیمیزه ضرر وئرر. هر کس له آنلاشماق و اورتا یول تاپماق، هر زامان دوغرو بیر استراتژی ده ییل. قوزئی گئتمک ایسته یین بیر، عینی زاماندا گونئی گئده بیلمز یا دا گونئی گئدن بیر ایله اورتاق یول پلانی قوروب حرکت گئچه بیلمز.

مجادله میزین ایله مه سی اوچون لازم اولان یئرلرده، تورک دونیاسی تشکیلاتلاری، اولوسلار آراسی تشکیلاتلار، حتی ایران داکی باشقا میللتلرین تشکیلاتلاری ایله، ایله کله ریمیز و هدفیمیز دوغرو لتوسوندا تاکتیکی کوردیناسیون لار ساغلانا بیلیر. آما هیچ بیر قوروم، قورولوش، تشکیلات، حزب و ... نه قدر احاطه لی اولسا دا، گونئی آذربایجانین سرنوشتی و تورپاقلاری قونوسوندا، مرکزیت چی مخالفت و باشقا اتیکلرین تشکیلاتلاری ایله مذاکره یه گیره بیلمز. چونکو نه اونلار گونئی آذربایجان میلیتین تمامی نی تمثیل اندیر، نه ده مرکزیت چی مخالفت و باشقا اتیکلرین تشکیلاتلاری اؤز خالقلارینی تمثیل اندیر. هیچ بیر ده منسوب اولدوقلاری خالقلارین طرفیندن قرار وئرجک اتکی و یئتکی یه صاحب ده ییل لر. یالنیز گونئی آذربایجانلی تمثیل ائدن بیر دولت اولدوغوندا، او دولت، باشقا دولت لر ایله مذاکره یه گیره بیلر و گونئی آذربایجانین تورپاقلاری و سرنوشتی ایله ایلیگی قرار آلا بیلر. بونون اوچون میلی دولتمیز قورولانا قدر، گونئی آذربایجان میلی حرکتینه منسوب تشکیلاتلار و میلی فعاللار، یالنیز و یالنیز، گونئی آذربایجان میلی دولتی نین قورولماسی نا اوداقلانمالی دیر و اونا چاتماق اوچون مجادله ائتمه لی دیر.

ایلکه لر

گونئی آذربایجان میلی حرکتی نین ایلکه لر

ایلکه لر، میلی حرکتی میزین تارتیشماسیز قبول ائدیله آن دوشونجه سی، اؤنجو پرنسیبلری و اصول لاری دیر. بو ایلکه لر گونئی آذربایجان میلی حرکتینین اساسینی تشکیل ائدیله و حرکتیمیزین هدفینه چاتماسیندا اؤنملی بیر رول اویناییر. اونلار دوروشوموزون کؤکو، کاراکتریمیزین اونورغاسی، دوغرو یولو تاپماغین پوسولاسی و مجادله میزین قانون لاری دیر. ایلکه لر، اولدوزلار کیمی یولوموزو گؤستریب، میلی حرکتیمیزی بلیرسیزلیک لردن و قارماشلاردان قورتاریب، دوزنه ی و اویمو ساغلار. ان چالخانته لی زمانلاریمیزدا بئله، ایلکه لریمیزه دایاناراق، حرکت ائتمه لی بیک و ایلکه لر سؤز قونوسو اولدوغوندا اؤدون وئرمه دن داغ کیمی دورمالی بیق.

ایلکه لر، آلاجاغیمیز قرارلارین قانونلاری دیر، هر حرکتیمیز و داورانیشیمیز، اونلارا دایالی و هدفیمیزه دوغرو اولمالیدیر. یعنی تورکلویه، آذربایجانا و خالقیمیزا دایاناراق، عدالت، اؤزگورلوک و اخلاقی ده یرلری دفته آلاق، تشکیلات روحنا ساریلاراق، ینیلیک چی پلانلار ایله، میلی هدفه دوغرو حرکت گئچیب، مجادله ائتمه لی بیک. میلی دولت آندیمیز، ایلکه لر ایسه اؤنجه لیک لری میزدیر. اؤنجه لیک لر، فرقی انسانلار و یا تشکیلاتلاردا، فرقی درجه ده اولاییلر. سول دوشونجه لی بیری اوچون عدالتین داها چوخ اؤنمی اولار، لیبراللار اوچون اؤزگورلوغون، تورکچولر اوچون تورکلوغون، وطن پرورلر اوچون آذربایجانین، محافظه کارلار اوچون اخلاقین. بونلارین هامیسی، دیگر ایلکه لره قارشى اولماییب میلی هدفیمیز دوغرولتوسوندا اولدوقجا، نورمال دیر و حرکتیمیزین ایچینده ده یرلندیریلیر. آنجاق بو ایلکه لر بیر بوتون دور و یولوموزو ایشیق لاندیران اولدوزلاردیر. گونئی آذربایجان یئرینه ایران و ایران چی لیک اوچون مجادله ائتمک یا دا ایلکه لریمیزین هر هانسی بیرینه قارشى اولماق یا دا اونلاردان بییرینی هدف یئرینه قویوب، یالیز اونون اوچون مجادله ائتمه یین آدی گونئی آذربایجان میلی حرکتی ده ییل. بورادان یولا چیخاراق، ساغ، سول، لیبرال، محافظه کار، فمینیست، لائیک، سکولار و ... دوشونجه و مکتب لری ده یرلن دیرمک اوچون، گونئی آذربایجانین اولماق ایله گونئی آذربایجان لی اولماغی آیرمالی بیق. گونئی آذربایجانین ساغی، سولو، لیبرالی، محافظه کاری، لائیکی، سکولاری، فمینیستی، دوغاجی سی و ...، گونئی آذربایجان میلی حرکتینین اصیل صاحب لری دیر. اما دوغوم یئری سببی ایله آذربایجان لی اولوب حتی تورک دیلینی چوخ یاخشی بیلن، ایران سولچوسو، ایران

ساغچی سی، ایران تورکچوسو، ایران لیبرالی، ایران لائیک، ایران محافظه کاری و ...، گونئی آذربایجان میلی حرکتیندن ده ییل، حتی میلی حرکتیمیزه ان بویوک ضرر وئرن لردن دیرلر. چونکو اونلار میللتیمیزین حقلی طلب لرینه قارش، فاشیست لرین الینده کی ان گوجلو چوماق لاردیر. گونئی آذربایجان اوچون اوره یی چیرپینان، ایلکه لریمیزه قارش اولمایان، گونئی آذربایجانین میلی دولتینین قورولماسی اوچون مجادله ائدن هر کس و یا تشکیلات، گونئی آذربایجان میلی حرکتینین بیر پارچاسی و صاحبی دیر. گونئی آذربایجاندا قورولاجاق دولتین ساغ، سول، لیبرال، لاییک و ... دوشونجه اساسیندا ایداره اولونماسینی ایسته مک ده هر گونئی آذربایجان میلی فعالی نین طبیعی حقی دیر.

ایلکه لریمیزین بیرینی هدف کیمی گوستریب، گونئی آذربایجان میلی حرکتی نین اصیل هدفیندن و باشقا ایلکه لریندن گنچمک، بیزی هم گنرچک هدفیمیزدن، هم ده ایلکه لریمیزدن اوزاق لاش دیرار و میللتیمیز اوچون ده هیچ بیر فایداسی اولماز. گونئی آذربایجان میلی حرکتی، یالنیز دموکراسی اوچون مجادله ائدن، یالنیز عدالت اوچون مجادله ائدن یا دا یالنیز رژیم ییخماق اوچون مجادله ائدن بیر حرکت ده ییل. گونئی آذربایجان میلی حرکتی، دموکراتیک، چاغداش و انسانی ایلکه لره دایانان بیر قورتولوش مجادله سیدیر، دموکراسی یا دا عدالت شووالیه سی ده ییل. بیز ایراندا و یا هر هانسی بیر جغرافیادا اولان حکومت لرین عدالتلی و داها دموکراتیک اولماسینی دستک له ییریک. اما اونون اوچون ساواش میریق، ائله بیر داوامیز و هدفیمیز ده اولابیلمز. بیز یالنیز میلی دولتیمیز قورولدوقدان سونرا، اؤز دولتیمیزین داها دموکراتیک و عدالتلی اولماسی اوچون، مدرن پارتی لر قوروب، مجادله ائده جه ییک.

تورک چولوک

تورک چولوک بولوت قاراچورلونون دئیدیغی کیمی “اؤزگه چیراغینا یاغ اولماق بسدیر، دوغما ائللریمیز قارانلیقدادیر” دئییب، نورو اؤز ائلینه و خالقینا یوکسلت مک دیر. تورک چولوک داخلی و خارجی دشمن لره قارشى یالنیز قالمیش و تورک اولدوغو اوچون ازیل میس، گونئی آذربایجان تورک لرینى مدافعه ائدیپ قورتولوش یولونو ایشیق لان دیرماق دیر. تورک چولوک ایلکهسی، اؤز کیم لی یینی سنومک، قوروماق و مدافعه ائتمک دیر، یعنی اؤزونه اینانماق دیر. تورک چولوک گونئی آذربایجانین بیر سوسیال حقیقتی دیر، اوندان ایشغال چی لبق وار نه ده عرق چی لبق. اوندان اؤزگووهن وار، اومود وار و گلجک وار. تورک چولوک باشقا خالقلارا قارشى کین و غرض دویقوسو ده ییل، تورک خالقینا درین سئوگی و باغلیلیک دیر. تورک چولوک، گونئی آذربایجان تورک لرینین قورتولوشو و اؤزگور، مرفه، و مدرن بیر گلجه یی نین آرزوسو و دویغوسودور.

بیر تورک چو، میلی قهرمان لارینا حرمت ائدر، اما قهرمان اولمایانان دا قهرمان دئمز. تورک لویه خور باخیب، تورک دیلی و مدنیتینى اؤز چیخارلاری اوچون آچالدان و یوخ سایانلاری، باغیش لاماز و اولناری باغیش لایان لاری دا دشمن سایار. تورک چولویون ان بویوک وظیفه سی، تورک لویه خدمت دیر، بونون باشین دا دا اؤز اطرافین داکی لارا تورک لویو سئودیر مک گلیر. یورولمادان بیخمادان، تورک دیلی و مدنیتی نین گؤزلیک لرینى آنلادیب، اونون ان بویوک دشمنی ده، ایران دولتی و ایران چی لی غین اولدوغونو آچیقلاماق دیر. تورک چولوق آچاق گؤنوللو اولماق دیر، بیر تورک چو، بهیه نیل مک اوچون ده ییل، وظیفه بیلدیغی اؤچون تورک لره خدمت ائدر. اؤزونون یوکسل مه یی اوچون ده ییل، تورک لویون یوکسلمه سی اوچون هر جور فداکارلیغا حاضر اولار.

دیلمیز، تاریخیمیز، توره میز، اینانجیمیز، عادت و عنعنه لریمیز، بیزی باشقا خالقلاردان آیریپ، کیم لی ییمیزی و منسوب اولدوغوموز مدنیتی یعنی تورک لویوموزو تانیم لار. اؤزونو صمیمی اولراق تورک مدنیتینه باغلی حس ائدن هر کس تورک دور. بو آنلاییش دان یولا چیخیب، بوتون گونئی آذربایجان تورک لرینى دوشونوب، اولنارین خوشبخت لی یی اوچون چالیش مالی ییق. آسیمیلاسیون نتیجه سین ده تورک دیلینی آز بیلن، حتی هیچ بیل مه یین

انسانلاریمیز دا بو ظالم سیستمین قوربان لاری دیر، اونلارین دا هارای هارای من تورکم دئمه یه و اونون خوشبختلی بیینی یاشاماغا حق لری واردیر.

بیز گوئی آذربایجان میلی فعاللاری، تورک اولدوغوموز اوچون و گوئی آذربایجان تورک لرینین ایچیندن چیخمیش انسان لار اولدوغوموز اوچون، تورک لرین یوکسل مه سی و حق لرینین هر شئی دن اوستون توتولماسی یولوندا چالیش ماغی، مقدس بیر وظیفه بیلیریک. تورک چولویه دایاناراق، میللتیمیزین میلی شعورونو یوکسل دیب، سیاسی لش دیریپ و اؤز سرنوشتینی تعیین ائتمک اوچون حرکت گئچیرمک، ان بؤیوک وظیفه میزدیر. بو دوغرولتودا تورکچه دانیشاجاغیق، تورکچهنی هر زامان هر شئی بین اوستونده توتاجاغیق، هر ایشیمیزده تورکون روحونا، تورکون اؤزل لی بیینه اویغون و تورک میللتینه فایدالی اولما شرطینه دقت ائده جه ییک.

آذربایجان چی لیق

بیز تورکلرین میللت و وطن سئوگیسی، آلاهیین بیزه وئردیغی بیر هدیه دیر. بئله سی آلولو وطن سئوگیسی هر میللتده اولماز. وطنپرورلیک دویغوسونو یاشامایان میللت لر، تاریخده یوخ اولماغا محکومدور. وطن بیر میللتین ائوی دیر و انو سئومک، آنا بابا سئوگیسی قدر طبیعی دیر. تورپاغینین قارا باغریندا سیرا داغلار کیمی دوران و تاریخ بویو اونون اوچون جانینی فدا ائدن تورکلرین وطنیدیر آذربایجان. آذربایجان چی لیق دا، آذربایجان تورکلرینین وطن سئورلیک دویغوسونون آدیدیر. آذربایجان چی لیق، وطنین داشینا، داغینا، تورپاغینا جان فدا ائتمکدیر. باغینا، بوستانینا، حتی قورو چؤلونه عاشق اولوب، بو وطنین چئوره سی نی و گؤزه للیکلرینی قورماق دیر. دیلینه، دینینه و دوشونجه سینه باخمادان بو تورپاق لاردا یاشایان بوتون انسان لاری سئومک دیر. اؤز وطنینی، بایراغینی و میلیلی دولتینی جانین دان و مالین دان اوستون توتماق دیر. آذربایجان چی لیق، هم وطن اوچون یاشاماق دیر، هم ده وطن اوچون اؤلمک دیر. گونئی آذربایجان، آنجاق وطن یولوندا هر جور فداکارلیغا حاضر اولان وطن سئور انسان لار، یعنی آذربایجانچی انسانلار سایه سینده آزاد اولوجاقدیر.

اسارت دن قورتولماق ایسته یین، اؤنجه وطنینی قورتارمالیدیر. بیز گونئی آذربایجان میلی حرکتی اولراق، اؤز وطنیمیزی اشغال دان قورتاریب میلی دولتیمیزی قورماق اوچون موجدله ائدیریک. بیز آذربایجان چی بیق و گونئی آذربایجان میلی دولتینی قوروب، اونون بؤلونمز بوتوولوگونو قوروما یا چالیشیریق. قورولاجاق میلی دولتیمیزین آپاریجی میلیتی و بؤیوک اکثریتی اولان تورکلرین میلی وارلیغی و بیرلی یینی قوروما غا چالیشیریق. بونونلا یاناشی وطنیمیزده یاشایان اتنتیک ازلیق لارین حاقلارینی قوروما غی دا وطن بورجوموز بیلیریک. بو تورپاق لاردا یاشایان هر کسین یاشامایا، مادی و معنوی وارلیغینی قوروما یا و گلشیدیرمه یه حق ی واردیر. دیلینه، دینینه و دوشونجه لرینه باخمایارق وطنیمیزده یاشایان بوتون اینسانلاریمیزی قورویوب، اونلارا، مرفه، اؤزگور و شرفلی یاشام سونما غی بونوموزون بورجو بیلیریک. اونون اوچون هیچ بیر زامان تورپاق لاریمیزین و وطنداش لاریمیزین هیچ بیر بؤلومونو فاشیستلر، تروریستلر و عشیرت آغلارینین الینده اسیر بوراخمایاجاییق یا دا رهین اولماسینا اجازه وئرمه یه جه بییک.

آذربایجان سجده گاهیمیز، تورک چولوک ایسه تاجیمیزدیر. تاریخیمیزده تورک چولوک و آذربایجان چی لیق، روس چولوق و فارس چیلیغا قارشی مودافعه حرکتی اولموشدور. بوگون آذربایجان چیلیغی و تورک چولویو بیر بیرینه ضد گؤستمکده ده، یئنه شهبه سیز ایران و روسیانی رولو واردیر. تورک لویو اله آلیب آذربایجانی انکار ائتمک اهانتدیر، بونون ترسی ده عینی درجه ده غفلت و اهانتدیر.

وطنین او تایی بو تایی اولماز، تانری بیزه واحد بیر آذربایجان وئریب دیر. بو وطنین هر قاریشینی سئویب قورومالییق، یعنی بوتووچو اولمالی ییق. آذربایجان چی لیق وطنیمیزین آیری دوشموش پارچالارینین بیرلش مه سئوداسی دیر و اونا مانع اولاجاق هر سوز و حرکت دن چکین مک دیر.

اؤزگورلوک چولوک

اؤزگورلوک چؤرک دن داها دادلی، گونش دن داها گوزل دیر. خوشبخت لیغین سیرری و تاریخین ایتیریل مهین دهیری دیر. کیم اولدوغونو بیلیب، اولدوغون کیمی یاشاماق دیر. اؤزگورلوک یولدان چیخماق ده بیل، ایسته دیغین یولا گنتمک دیر، یعنی اؤز بئینین ایله دوشونوب، دوغرو اولدوغونا اینیاندیغین شئی لر اوچون موجادله ائتمک دیر. اؤزگورلوک بیر بوتون دور، اونا شرط قویولماز و تمامی ایله قازانیلانا قدر هیچ قازانیل مامیش دیر. میلیت اؤزگورلوغو، جنسیت اؤزگورلوغو، اینانچ اؤزگورلوغو، دوشونجه اؤزگورلوغو و حتی حیوان لارین اؤزگورلوغو، بیر بوتون دور و بیر بیرینه باغلی دیر. اونلارین هامیسی و هامی اوچون تامین اولانا قدر، هیچ کیم اؤزگور ده بیل دیر. اؤزگورلوک بیر حق ده بیل، بیر انسان لبق وظیفه سی دیر. کیچیک چیخار و وعده لره آلدانیب اؤزگورلوغونون تمامی و یا بیر قیسیمینی ترک ائدن انسان، اصلینده انسان لیغین دان و وظیفه لرین دن ال چک مییش دیر.

هر تبعیض اؤزگورلوغه بیر سالدیری و فلاکت لرین اساس سببی دیر. تبعیض لرین قاینایینی بیلمه دن اؤزگورلوک اولماز و نه قدر مجادله ائدسک ده، اونون سبب اولدوغو فلاکت لر دن قورتولماق اولماز. گونئی آذربایجان میلیتی، تورک اولدوغو اوچون، تبعیض لره، تحقیرلره و دیش لان مالار معروض قالیب، فلاکت لره دوشوب دور. بونون اوچون گونئی آذربایجان تورک لرینین، اسارت زنجیرلرین دن قورتولوشو و اؤزگورلوغو، آنجاق تورک لویونه ساریلیب، میلی دولتینی قوروب، اؤزو اؤزونو اداره ائتمک له ممکن دیر. میلی دولتیمیز اولمایانا قدر و اؤزوموز اؤزوموزو اداره ائتمه یینه قدر، آزاد اولایلمه یه جه ییک. تبعیض لر، تحقیرلر و دیش لان مالار دوام ائده جک و فلاکت لر ایچینده یاشاییب، اؤزگور اولمادیغی اوچون محو اولان باشقا میلیت لر کیمی، محو اولاجایق.

بیزیم اؤزگورلوک مجادله میز، گنچ مییش دن گلن ان دهیرلی خزینه میز دیر. بیز بیر عمر تحقیر و فلاکت ایچینده یاشاییب اولمک یئرینه، شرف و حیثیت میزله اؤزگورلوغوموز اوچون ساواشیب بو یولدا اولمه یی ترجیح ائدیریک. اما بونو دا بیلیریک کی بوتون گوج و اراده سی له اؤزگورلوک مجادله سی ائدن بیر میلیتین قارشسی سندا هیچ بیر گوج دایانا بیلمز. گونئی آذربایجان میلی فعاللاری، اؤزگورلوک و عدالت مجادله لرین ده، کؤله اولماغی و باشقالارینی کؤله ائتمه یی قبول ائتمه یین، شرفلی بیر بایراغین داشی بیجی لاری دیرلار. اونلار، اوغروندا

اؤلونه جک قدر دیرلی و حق لی داوامیزی، جسارت، اورک لی لیک، اتیلقان لیق و ایلکه لریمیزه ساریلاراق، هدفه دوغور آپارماغی، بیر انسان لیق وظیفه سی بیلن قهرمان لاریمیزدیر.

یوز ایل دن چوخدور گونئی آذربایجان ی بوش وعده لر ایله آلداتیب مشغول ائدیبلر. گلین بیرلیک ده ایران حکومتینه قارشی ساواشیب اونو اصلاح ائدیب یا دا دییش دیریب، داها دموکراتیک ائده ک، سونرا آذربایجانین پایینی دا آلا ریک دئییب لر. یوز ایل دن چوخدور ان بویوک دردیمیز یعنی اؤزگورلوغوموزون اوغورلان دیغینی، دولت سیزلی بی میزی و اشغال آلتیندا اولدغوموزو اونودوب، کیچیک درد لر ایله اوغراشیب بوغولوب قال می شیق و هر دفعه قازان دیق دئی ییمیزده گورموشوک کی، اصلینده اونلار قازانیب بیز مغلوب اولموشوق. آرتیق بؤ یوک داوامیز، یعنی گونئی آذربایجان اوچون میلی دولت قورما و قورتولوش موجادله سی نین زامانی چوخدان گل می ش دیر. بیز گونئی آذربایجان میلی حرکتی اولراق بیر داها کیچیک درد لر اوغرونا آماجیمیزدان گنج مه یه جه ییک. بیر داها هیچ بیر تاکتیکی و کیچیک باشا رلار اوغرونا دولت قورما هدفیمیز و ایلکه لریمیزدن یعنی کیملی بی میزدن، اؤزگورلوغوموزدن، تورک لویوموزدن و وطنیمیزدن گنج مه یه جه ییک. گوره جه بی میز ایش باشا ریسیز اولاجاقسا اولسون. باشا ریسیز لیق اؤلوم جول ده بیل، اؤنم لی اولان دوام ائتمه جسارتینی گؤ ستر مک دیر. حاقلی مجادله میز، بیر نچه یانلیش و باشا ریسیز ایش ایله مغلوب اولماز. بیز باشا ریسیز اولدوغوموزدا ده بیل، واز گنج دیغیمیزده مغلوب اولوروق.

عدالت چی لیک

عدالت انسانین دوغال حقی، حضورون آچاری و مدنیتین ایلك شرطی دیر. انسان روحو و انسان لیک تاریخینین هر زمان ان اساس ده یئرلرین دن بیری اولان عدالت، بیر توپلومون نظامینی ساغلار و انسان لارین بیر بیرینه سایقیلی و عادل اولماغینی تشویق ائدر. عدالت انسان حق لرینی قوروپوب و حق سیزلیکلرین قارشسی سینی آلاق، توپلومو بیر آرادا توتوب، داها گوجلو ائدر. عدالت یالنیز ثروت و مادی شئی لرله ایلگیلی ده ییل، یاشامین بوتون سوسیال و مدنی امکان لارینین دا دنگه لی پایلاشیمی دیر. بیر دولت عدالت اوستونده قورولار و خزانه سی عدالتدیر.

عدالتین اساسی حقانیت، ارم، احساس و وجدان دیر. گونئی آذربایجان میلی حرکتی نین عدالت ایلکه سی بو معنوی و دو یغوسال کؤکه دایاناراق خالقیمیزین و دونیانین وجدانینا، یعنی انسانلارین ایچینده کی عدالت دو یغوسونا سس له نیر. ایران دولت چیلی یی، قورولدوغونان بری، گونئی آذربایجان تورک لرینه، سیستماتیک شکیده سوی قیریم سیاستی آپاریر. میللتیمیزین دیلینی، مدنیتینی و بوتون معنوی وارلیقلارینی تحقیر ائدیپ باسقی آلتیندا توتوب، انسانی حق لرینی یوخ ساییر. گونئی آذربایجانین تورپاقلارینی پارچالاییب، میلی کیملی ییمیزی سیل مک ایسته ییر. تاریخی اثرلریمیزی، چوره میزی و طبیعتیمیزی قصدا تخریب ائدر. بللی سیاستلرله، آذربایجانین، انکشافینا مانع اولاراق، خالقیمیزی ایشسیز، یوخسول و چاره سیز وضعیتنه گتیریب، اؤز تورپاق لارین دان سورگون ائتمه یه چالیشیر. بو سیستماتیک آپارتایدا قارشسی اعتراض ائدن لری ده، آغیر شکنجه و حبس جزالاری ایله سوسدورمایا چالیشیر. بو ظلم و عدالت سیزلیکلردن، آنجاق بیزی تمثیل ائدن بیر میلی دولتین قورولماسی ایله قورتولا بیلرک و اوندان باشقا بیر چاره میز یوخدور. باشقا یوللارین هامیسینی گنچمیش یوز ایلده تجربه ائتمیشک. گونئی آذربایجان میلی حرکتی، عدالت سیزلیکلردن جانی یانمیش، تورک اولدوغو اوچون تحقیر اولونموش و اقتصادی فلاکت لره سوروک لنمیش انسانلارین، حق و عدالت داواسی دیر. بو حرکت نه ظلم، نه ده مرحمت، یالنیز جا عدالت ایسته ییر.

یوز ایللرین عدالت سیزلیکلرینی گونئی آذربایجان دان قالدیرماق اوچون هم داغیدیجی عدالت، هم ده دؤزلدیجی عدالتنه احتیاجیمیز واردیر. داغیدیجی عدالت، برابرلیک اساسیندا اولار و

هر کسین وظیفه سی و زحمتی نین قارشلیغینی آلماسینی ساغلار. آنجاق دؤزلدیجی عدالت سایه سین ده، وار اولان پوزونتولار دا دؤزلیب، حقیقی برابرلیک ساغلانار. دوزلدیجی عدالت، گنجمیش ده کی وارلیق و حق بؤلگوسونده کی عدالتسیزلیک لرین تلافی ائدیلمه سینی ساغلار. مثلا یوز ایلدن چوخدور آذربایجانین باسقی آلتیندا توتولان مدنیت و دیلی، باشقا دیلر و مدنیت لر ایله ائشیت وضعیتیه گه له نه دک، دوزلدیجی عدالته تابع توتولمالیدیر. عینی شکل ده تهران، قزوین، همدان، بیجار و خزریانی شهرلر کیمی گونئی آذربایجانین داها چوخ آسیمیلایسونا معروض قالمیش بؤلگه لرینین تورکلری اوچون ده، دوزلدیجی عدالت تامین ائدیلمه لی دیر. خانیملارین سوسیال و اقتصادی وضعیت لری، کیشی لر ایله برابر سوبه یه گه له قدر، دؤزلدیجی عدالت تطبیق ائدیلمه لیدیر. میلی حرکت اولراق، تشکیلاتلاریمیزدا و فعالیت لریمیزده خانیملارا دوزلدیجی عدالت چرچیوه سین ده، پوزیتوو آریمجیلیق ساغلانیل مالیدیر. مرکزینده، اداره سینده، اساسیندا و ایچینده خانیملارین اولمادیغی بیر سیاسی مجادله، مجادله ده ییل.

گونئی آذربایجان میلی حرکتی اولراق، مجادله میزده، قرارلاریمیزدا و فعالیت لریمیزده هر زامان عدالت لی اولمالی بیک. اداره ائندی بییمیز تشکیلات و قورولوشلاردا، وظیفه لری اینسانلارین امک لری و عهدده لن دیک لرینه گوره بؤلمه لی بیک، دوستلوک و یاخین لیغا گوره ده ییل. میلی فعاللاری و تشکیلاتلاری تنقید اندرکن عدالت لی اولمالی بیک. وار اولان وضعیت یی نظره آلاق تنقید ائتمه لی بیک، ایده آللارا دایاناراق ده ییل. یالنیز مجادله ائدن و ایش گورن میلی فعاللاری و تشکیلاتلاری ده ییل، پارلاق فیکیرلری اولان اما هیچ بیر ایش گورمه ین لری ده سورغویا چک مه لی بیک. رای بیلدیرمک ایله تنقیدی بیر بیریندن آیرمالی بیک. هر انسان هر موضوع دا رای یینی بیلدیرمک حقیقه صاحب دیر، اما تنقید ائتمک اوچون او قونودا بیللیک لی یا دا تجربه لی اولمالیدیر. تطبیقی ممکن اولمایان سببلره دایاناراق رد ائتمه یین آدی تنقید ده ییل. تپه نین باشیندا اوتوروب ساواشی ایزله ییب، سونرا آشاغی یئنیب، دیری قالانلارین باشینا وورماغین آدی هر نه اولسا دا، تنقید هیچ ده ییل.

اخلاق چی لیق

اخلاق بیر توپلومدا یاخشی-پسی، دوغرو-یانلیشی و اویغون-ایغونسوزو بیر بیرینده آبیرون دهیرلر و ائتیک لردیر. اخلاق، توپلومسال تجربه لر و وجدانیمیزدان قایناق لانان و توپلومون، عادت، عنعنه و اینانج لارینا گیرمیش، دایانیشما روحدور. اخلاق هر کسین ائتدی بی شئیلر ده ییل، هر کسین ائتمه سی گرکن شئی لردیر. اخلاق میللت لری چؤکمک دن قورتاریب، محافظه ائدن دوغال بیر قورتاریجیدیر. اخلاق و اردم، قرارلاریمیز و عمل لریمیزین رهبری، دوغرو اداره نین اساسی، یاخشی لاری الدهه ائتمه یین گوجو و میلی روحون زینتی دیر. اخلاق چیلیک، اؤز خالقینا مسؤلست حسی دویوب، ائدیله جک دوغرو ایله، ائدیله مه یه حقین اولانلارین آراسیندا کی فرقی بیلیمک دیر. یعنی شخصی منفعت لر آردینجا گئتمک یئرینه، میللتیمیزین و میلی حرکتین چیخارلارینا آدانماقدیر.

باشاری، اخلاق دان سونرا گلر. میلی حرکتیمیز، ایچدن گلن بیر سؤگی، اخلاق و عقلانیت ایله اداره اولونماسا، چؤکوب یوخ اولار. میلی حرکتیمیزین ایلرله مه سی، یالنیز بؤیوک ائیلیم لر و تشکیلاتلارین قورول ماسینا باغلی ده ییل، میلی فعاللاریمیزین اخلاقی دهیرلرینه ده باغلی دیر. چونکو بیر حرکتین دهیری، اونو مدافعه ائدن انسانلارین دهیری قدر اولار. بؤیوک داوالار، شخصیت لی و اخلاقی لی اینسانلارین چیگیین لرین ده ظفره یئتیشر. گونئی آذربایجان میلی حرکتی، یانلیش و اویغونسوز داورانیش لاردان اوزاق دوران، اخلاقی و ائتیک انسانلارین حرکتی دیر. اخلاق و سیاسی ائتیک، عینی زاماندا بیر لیدرلیک مسئله سی دیر. دوغرو لیدر، اخلاق و سیاسی ائتیک نمونه سی اولار و توپلومون اساس قورولوشو و دهیرلرینین ضعیف له مه سینه سبب اولماز و باشقالارینین دا ضعیف لت مه سینه اجازه و ثرمز. یالنیز اؤزونون دوغرو بیلدی بی اخلاقی دهیرلرله ده ییل، یایغین شکیلده خالقیمیز طرفیندن قبول ائدیلهن اخلاقی دهیرلره ده دقت ائدیپ اولناری سیاسی گوجه چئویر.

هر میلی فعال، یئنی بیر حیات و بویوک ایده آل لار اوچون موجداله ائدن، توپلوما یؤن و ثرمه یه چالیشان، اینسانلارین باخیش لارینی، داورانیش لارینی و تپکی لرینی شکل لن دیرمه یه چالیشان، ایلکه لی و اینانج لی بیر انسان دیر. داواسینی آنلایان، داواسینا اینانان، داواسینی اؤز حیاتیندا یاشایان و گوجو یئتدی بی قدر، داواسینی باشقالارینا آنلاتان، ایلکه و عمل صاحبی اولان، اخلاقی بیر انسان دیر. گونئی آذربایجان میلی فعالی، انسان لارین حیاتینا

تأثیر ائدن هر فعالیتینده، اخلاق چرچیوه سینده اولمالی دیر و گنل اخلاق، سیاسی ائتیک لر و مسئولیت اخلاقی چرچیوه سینده فعالیت ائتمه لی دیر. بورادا سؤز قونوسو، اخلاق نمونه سی اولماق ده ییل، میلی حرکتی میزی سورو آلتینا آپاراجاق داورانیشلاردان و خالقیمیزین اینانچ و یاشام طرزینه تحقیر و حرمت سیزلیکدن اوزاق دورماغی قصد ائدیریک. چونکو هر میلی فعال، گونئی آذربایجان و تورکلویون بیر بایراغی دیر، بایراغیمیزین لکه لن مه سینه اجازه وئرمه مه لی دیر. سیاسی ائتیک اولراق وظیفه لرین عدالت لی و طرفسیز پایلاشیمینی ساغلا ییب، اؤز وظیفه لرینه ده صداقت لی و توتارلی شکیلده عمل ائتمه لی دیر. اونون لا فرقلی دوشونن میلی فعاللار و تشکیلاتلارا آلچال دیجی سوزلر دئممه مه لی دیر و افترا آتمه لی دیر. باشقاسینا تنقید ائتمه دن اؤنجه اؤزونه باخمالی دیر. ائدیغی ایشلرین و نتیجه لرینین مسئولیتینی قبول ائتمه لی دیر. ائقودان، تکبردن و حرص دان اوزاق دورمالی دیر. بونو بیلمه لی دیر کی نه قدر چالیشقان و میلی حرکتیمیزه فیدالی و اؤنم لی بیری اولسا دا، حرص لاری، ایده آل لرینین اؤنونه گنچسه، ایستر ایستمز، یا طرفی داغیلار، یادا میلی فعالیت دن گئری چکیلمک مجبوریتیده قالار. ائله میلی حرکتیمیز ده، اصیل او زامان ضرر گؤره ر.

سیاسی فعالیت لرین بؤیوک فلاکت و دردله سبب اولما احتمالی یوکسک دیر. فعالیت و ائیللم لریمیزین، ایسته مه یرک اولسا دا، سبب اولدوغو یانلیش لیق لار و درد لرین مسئولیتین دن قاچما حق یمیز یوخدور. هدفیمیزین بؤیوک لویو و نیت یمیزین یاخشی اولماسی، بیزه اونلارین نه قیمتده اولورسا اولسون ائتمه حقینی وئرمز. بونون آدی سوروملولوق اخلاقی دیر. گوج لن مه یه چالیشیرکن، اؤزلویوموزو، ائتیک لریمیزی و عدالت دو یغولاریمیزی آیاق آلتینا آلمال ییق. اخلاق شخصی بیر دیسیپلین دیر، باشقالارینی یا دا تشکیلاتیمیزی اؤز دیسیپلین سیزلی یمیزدن و یانلیش لاریمیزدان مسئول توتامال ییک.

خالق چی لیق

خالق چی لیق، خالقین حر اراده سی نی، دموکراسی نین تمل داشی بیلیم، هر شئی یین مرکزینه آلماق دیر. خالقیمیزا قارشى سوروملولوق و وفا دویغوسودور. خالقیمیزین مادی و معنوی وارلیغینی قورویوب گه لیش دیرمک دیر. خالقین سسینی دویوب، خالقین دیلی ایله سس له نرک، اونلارین سئوگی، گووه و دسته یینی قازانماقدیر. خالقیمیزین دؤشونجه لرینه، اینانچ لارینا و عادت عنعنه لرینه سایقیلی یاناش ماق دیر. اونلار اوچون هر جور فداکارلیغا حاضر اولوب، یئری گلدی یین ده، شخصی منفعت لردن ال چک مک دیر. خالقیمیزی گونئی آذربایجان میلی حرکتینه جذب ائدیپ، میلی حرکت ده توتوب، بیلینج لن دیریپ، بیرلی یینی و دایانیشماسینی ساغلاماق دیر.

گنچمیش یوز ایله ده، گونئی آذربایجانین بیر چوخ آیدین و اوخوموش انسانی، اؤز میللتینه خیانت ائده رک، اشغالچی ایران ایستثمارینین ماشاسی اولوبدور. بوگون خالقیمیزین اوغرادیقی ظلم لر، عدالت سیزلیک لر و فلاکت لرین بیر چوخو، ائله اونلارین، عرق چی ایران دولتی ایله ایش بیرلیغی نتیجه سین ده باشینا گلیب دیر. بونون اوچون گونئی آذربایجان تورک لرینین بیر چوخو، ائلیت و آیدین لارا قارشى، حتی اونلار اوچون مالیندان و جانیندان گنچن میلی فعال لارا قارشى، گووه ن سیزدیر و قورتولوشونا دا اومودنو ایتیریپ دیر. بو اومودسوزلوق دا خالقیمیزین دورغون لوغونا سبب اولوب، بؤیوک حرکت لر و حمله لر قابلیتینی آزالدیپ دیر. گونئی آذربایجان میلی حرکتی، دوغرو پلان لار ایله، خالقیمیزین گونینى قازان مالی دیر، اونلارا صاحب چیخیپ، اونلارین سسی اولراق، یاردیم سیز و حمایت سیز اولمادیق لارینین گووه نینی و ثرمه لی دیر. ازیلن خالقیمیزا، یالنیز اولمادیق لارینی گوستریپ، آرخالاریندا، دنیا سویه سینده بیر سیاسی گوج و میلی حرکتین اولدوغونو گؤسترمه لی دیر.

خالقیمیز حق لرینی آلماق گوجونه صاحب اولدوغونا اینان ماسا، حق لرینه نئجه یئتیشه جه یینی ده دوشون مز. اونلارا گوج لرینی آنلادیپ، اومودلان دیریپ، انرژى لرینی میلی حرکتین هدفی یؤنون ده سفربر اندیب سوسیال گوجه چئویرمه لی بیک. خالقیمیز، گونئی آذربایجان ملی حرکتینین گوجونون گرچک قایناغی دیر، اونو استفاده ائده بیل مه سک ایتیریپک. بونون اوچون، گونئی آذربایجان میلی حرکتی، باشدان سونا قده ر خالقین حرکتی اولمالی دیر. خالقیمیزین ایزله دیغی بیر حرکت ده بیل، اوینجو اولدوغو بیر حرکت اولمالیدی.

بیزیم مجادله میزین کؤکونده سئوگی وار. بیز میللتیمیزی سئودی بیزیم اوچون مجاله ائدیریک. بو دا شخصی چخارلار یا دا باغلی اولدوغوموز تشکیلاتلارین چخارلاری اوچون پوپولیسستی حرکتلر ائدیپ، انسانلارین دوغولارینی استثمار ائتمکله ده ییل، خالقیمیزین و گله جک نسلین، چخارلارینی و انسانی حاقلارینی قورویوب، اولارلا خدمت ائتمکله اولار. بونون اوچون هر بیریمیز بیر دولت آدامی کیمی، اویغار یاشامین اساسی اولان انسان حق لری چرچیوه سینده، بوتون خالقیمیزا دموکراتیک بیر دولت و شرفلی بیر یاشام ساغلانماسی اوچون مجادله ائتمه لی بیک. آنجاق بونو دا بیلمه لی بیک کی، هیچ بیر تشکیلات و حتی گونئی آذربایجان میلی حرکتینین بوتونو، گونئی آذربایجانین بوتون خالقینی تمثیل ائتمیر و اکثریتی نین ایسته یی ایله حرکت ائتمک مجبوریت نده ده ییل. اکثریتین ایسته یینه اویماق بیر دولتین وظیفه سی دیر، بیر تشکیلات یا دا حرکتین وظیفه سی ده ییل. میلی دولت اولمایانا قدر خالقیمیزین میلی اراده سی اورتایا چیخماز و اکثریتین نه ایسته دی یی ده بللی اولماز. هیچ بیر قورتولوش ساواشی، حقیقتی گؤرن لر دیشیندا کی اکثریتین اویو ایله قازانیل مامیش دی. گونئی آذربایجان میلی حرکتی، قورتولوش مجادله سی وئرن بیر دوشونجه آخینی و حرکتی دیر، گونئی آذربایجانین دولتی ده ییل. میلی حرکتیمیز، خالقیمیزین ایچینده کی اؤز تابانین دوشونجه و ایستکلرینی تمثیل ائدیر. اؤزونو صمیمیتله تورک و آذربایجانلی بیلن، تورکلوک و آذربایجانین منافع و خوشبخت لیغی اوچون اوره یی چیرپینان و فداکارلیغا حاضر اولان انسانلار، بو حرکتین تابانی دیر. گونئی آذربایجان میلی حرکتی نین اساس گؤره وی، اؤز تابانین ایستکلرینی دیقته آلاق میلی دولتیمیزین قورولماسی اوچون وار گوجو ایله مجادله ائتمک دیر. عینی زاماندا دوغرو استراتژی لر و تاکتیک لر ایله، خالقیمیزین دیگر بؤلومونو ده، میلی حرکتین دوشونجه سینه جلب ائدیپ اؤز تابانینا داخیل ائتمک دیر. وظیفه میز خالقیمیزی اولماق ایسته دیک لری یئره ده ییل، اولماسی گرکن یئره آپارماق دیر.

یئنی لیک چی لیک

یئنی لیک، سینیرلاری آشماغین آچاری و گه لجه یی شکیل لن دیرن گوج دور. آددیملاری جسارت له آتماق و یئنی افق لره ایبرله مک دیر. یئنی لیک چی لیک رقابت ائتمک اوچون ده ییل، او یونون قایدالارینی ده بییش دیرمک اوچون چابالاماق دیر. هرکسین گوردویونو گوروب آما کیمسه نین دوشونمه دی یئنی دوشونمک دیر. گه لجه یی تخمین ائتمک یئرینه، گه لجه یی یاراتماق دیر. ائتدیگ لریمیز قدر، ائتمدیگ لریمیزدن ده غرور دویماق دیر، مینلرجه شئییه یوخ دئمک دیر. دوشوندویوندن داها بویوک دوشونمک دیر. هر بحرانی بیر فرصت بیلیب، شهبه ائتمه دن و جسارت ایله، یئنی بیر حمله پلانی قورماق دیر.

زمان ان بویوک یئنی لیک چی دیر، هر زمان یئنی چاره لر تاپمالی بیک یوخسا باشیمیزا یئنی بلالار گلر. ده بییش مه سک، یئنی لن مه سک، گنج لشمه سک، چورومه یه محکوم اولاریق. یئنی لیک چی لیک، ایچین ده اولدوغوموز وضعیتنه قانع اولماییب، داها یئنی، انکشاف ائتمیش و مکملی ایسته ییب، یئنی یوللار و چاره لر تاپماق دیر. یئنی لیک چی لیک انسانلارا سهو حقی وئریمک دیر. سهولرله دولو، شرفلی بیر مجادله ائدن انسان، هیچ بیر ایش گورمه یین، ان پارلاق دوشونجه لی انسانلاردان داها فایدالی دیر. گونئی آذربایجان میلی حرکتی، خالقیمیزی داها اوزگور و رفاه لی وضعیتنه گتیرمک اوچون یئنی لیک چی تدبیرلری، جسارت و اوزونه گووه ن ایله بیرلش دیریپ، گنج-گوندوز دئمه دن میلی دولتیمیزین قورولماسی اوچون چالیشان، میلی بیر حرکت دیر.

یاشام گوجو اولان هر کهنه یی سنوریک، آما بیزی بوتون گوجو ایله یاشاداجاق تک شئی یئنی لیک دیر. یئنی دؤورلری یئنی اینسانلار تمثیل ائدر و یئنی بیر گون دوغارکن بیر چوخ اولدوز باتار. هیچ بیر دؤور، گنجیمیش ده تجربه ائدیلیمیش اینسانلارین چیگین لرینده یوکسل مز. بونون اوچون، یئنی لیغین اساسی اولان گنج لره، داها چوخ دقت ائتمه لی بیک. میلی هدفیمیز، یعنی گونئی آذربایجان میلی دولتینی قورماق یولوندا یئنیل مز گوجوموز و گارانتی میز گنج لردیر. میلی حرکتین ظفری، اعتراض ائدن یئنی نسل ایله اولاجاق، اطاعت ائدن نسل ایله ده ییل. آرتیق احتیاطلا ایران چی لیک دوشونجه سینین چیخماز کوچه لرینده یولونو آختاران و ایرانین چوروموش حکومت لرینده اوزونه فایدالی فرصت لر یاخلاماغا چالیشان، تمکین لی و ترددی نسل یوخ دور. اونون یئرینه، دینامیک، مغرور و اوزونه گووه ن لی

بیر گونئی آذربایجان گنج لیغی وار. یئنی گنج لیک، اؤز حیاتی نی یاشاماغا و سرنوشتینی اؤز اللرینده توتماغا عظم لی و اراده لی دیر. گونئی آذربایجانین پارلاق گله جه یی بو نسلین الینده دیر. قیزلاریمیز میلی دولتیمیزی، اوغلان لاریمیز ایسه، میلی اوردوموزو قوراجاق لار.

گونئی آذربایجان میلی حرکتی اولراق، اؤز مدنیتیمیزده یئنی لیک لره یئر آچیب، باشقا میللت لری چاغداش و دیرلی یؤنلرینی آلیب قایناش دیرمالی ییق. اما خالقیمیزی تحقیر ائده رک یا دا بیزی بیر میللت ائدن کؤک لریمیزی کسه رک ده ییل. میللت لر اولو بیر آغاچ کیمیدیر، اولو بیر چینار، تورپاغین اوستونده نه قدر یوکسل میش سه، تورپاغین آلتیندا دا او قدر درین لره گئتمیش گئنیش کؤک لری واردیر. اولو بیر آغاجین کؤک لری کسبل سه او آغاجی یاشادماق و تورپاغین اوستونده دیک توتماق ممکن ده ییل. بیر میللتین کؤک لری ده میلی تاریخ دی، عادت عنعنه لری و اینانجلاریدیر. حقیقی یئنی لیک، آنجاق گئچمیشی بیلن لردن چیخار و قایناق لارا دؤنوش له باشلار. ان بؤیوک ارم، ایچینده اولدوغوموز وضعیت ییلیب، دهیرله ندیریپ، گوجه چئویریپ، پیله ائدیپ داها چاغداش و گلیش میش بیر وضعیته داشیماق دیر.

تشکیلات چی لیق

تورکون ان اؤنملی وصفی اؤرگوت چولوک یعنی تشکیلات چی لیق دیر. تشکیلات چی لیق دایانیش مانین، ثمرلی لی بین و باشارینین اچاری دیر. تشکیلات چی لیق، یولوموزو بلیرله یین و بیزی بیرلیک ده حرکت گنچیریب، ظرفه آپاران ایلکه دیر. تشکیلات اولماق، عینی ده یئرلی پایلاشیب اورتاق بیر هدفه کیلیدلن مک دیر. تشکیلات، بلیرلی بیر نظم ایله قورولموش قورم سال بیر سیستم و مسئولیت-اختیاراتین نجه بؤلوشدوروله جه یینی بلیرله یین مکانیزمانین آدیدیر. تشکیلات چیلیغا صرف ائندی بیمیز هر دقیقه، بیزه بیر ساعت قازان دیریر. یعنی تشکیلات چی لیق بیر لوکس و سچیم ده بیل، حیات دا قالما باشاریسی و بیر احتیاج دیر. آرتیق پهلوان و سوپرمن لرین زمانی گنچیب دیر، بو گونون شرط لرین ده، یالینز تشکیلات و ائکیب چالیش ماسی ایله باشاری الده ائدیله بیلر. هدفه چاتماغین یولو گوج دن، گوجون یولو ایسه، تشکیلات لانماق دان گنچر. تشکیلات چی لیق بیزه عظم ایله چالیشمانین گوجونو وئر و نه لر باجارا بیله جه بیمیزی اؤرگه در.

هر تشکیلاتین، بیر روحو و عقلی اولار. تشکیلات روحو، اینسانلارین ائگولارینی ایکینجی پلانا آتیب تشکیلاتین اوغورو اوچون مجادله ائت مک دیر. تشکیلات عقلی ایسه، بیلگی پایلاشیمی، ایش بیرلیک و استراتژیک دوشونجه دن یارانان کولکتیو ذکا و قرار وئرمه قابلیتی دیر. تشکیلاتین عقلی تشکیلات داکی اینسانلارین عقلیندن داها بؤیوک اولار و اونون روحو بیزه سونسوز بیر خیال گوجو وئرر. اوغورلو بیر حرکت ایله اوغورسوز حرکت لرین فرقی، گوج یا دا بیلگی اسکیک لی بین ده ده بیل، تشکیلات اسکیک لی بین ده دیر. تشکیلات روحو دایانیش ما، آز گوج ایله بؤیوک ایشلر گورمه بین تک و ده بیشمز چاره سی دیر. تشکیلات و دایانیش ما اولمایان یئرده، ایچدن ایچه بیر چکیشمه اولار.

بیر آرایا گلمک باشلانغیچ دیر و بیر گروه یارادار. گروه یولداش لیق و تانیشلیق ایله قورولار و داها ائلاستیک دیر. آنجاق بیر آزادا دوروب، تشکیلات لانیب، مسئولیت عهدله نه ییب، بیرلیک ده چالیشماق، بیر ارم دیر. تک باشینا یا دا کیچیک گروه لار ایله، آنجاق کیچیک و تاکتیکی باشاریلار گوجوموز یئتر. وطنی قورتاریب، میلی دولت قوروب حاکمیتی اله گنچیرمک ایسه، آنجاق ساغلام تشکیلات لانماق دان گنچر. تشکیلات روحو، پول ایله ساتین آلینماز. پول، انسان لارین ایشلرینی گوروب حیات لارینی دوام ائتمک اوچون بیر وسیله دیر اما

اونلاری بیر تشکیلات ائتمک اوچون یئترلی ده ییل. تشکیلات، یالنیز عضولر ایله دییل، اونلاری بیر بیرینه باغلایان گۆرون مز باغلارلا قورولار. بو باغلاری قورا بیلیمک اوچون اونلاری هیجانلاندیران بیر آماج، شفاف بیر نظام و عدالتلی بیر وظیفه-اختیارات سیستمی و امک باغی اولمالی دیر. بیر تشکیلاتدا بو خصوصیتلر اولورسا، بوتون امکان سیزلیق لارا باخمایاراق باشاریلی اولار. چونکو بئله بیر تشکیلات ایله چالیش دیغیمیزدا، داها گوجلو خصوصیتلره و ائتکی یه صاحب اولاریق. اونلار دا هدفه گندن یولوموزو قیسالدان ان گوجلو سلاحیمیز اولار. دوشمن لریمیزین ان قورخدوغو شئی ده، ائله دوغرو تشکیلات چی لیق سایه سینده الده ائده جهیمیز بو سلاح و گوج دور.

هر گونئی آذربایجان میلی فعالی تشکیلات قورماغی، اولدوغو یئردن باشلامالی دیر. تشکیلات اولماق بیر یولچولوق دور، هدف ده ییل. بو یولچولوغا گیرمک اوچون بیر ویزیونا احتیاجیمیز وار بیر ده جسارته، مکمل اوماغا احتیاجیمیز یوخدور. هاراداسینیزسا، اورادان باشلایین، الینیزده اولانلاری استفاده ائدین، الینیزدن گلن ایشی گۆرون. اولدوغونوز مدرسه، اونیوئرسیته، اداره، محله و شهرده، میلی دوشونجه لی انسان لاری تاپیب، اونلار ایله ارتباطا گنجیب گروه لاشیب سونرا تشکیلات لاین. تشکیلاتدا مسئولیت عهده لن مه یه گۆنول لو اولون و وئرین وظیفه لری قصورسوز شکیلده یئرینه یئتیریب، تعقیب ائدین. حرکتیمیزین وارلیغی، دواملی لیغینا باغلی دیر، لاولالی لیک، دیسیپلین سیزلیک و متدسوزلوق دان اوزاق اولون. اوزاقدا خیال کیمی دوران بیر شئی گۆرمه یه چالیشماق یئرینه، اؤنونوزده آچیقجا دوران ایشی گۆرون. سیزینله چالیشان میلی فعاللارا گووه نین، اونلارا بیر ایشی نجه گۆوره جک لرینی آنلاتماق یئرینه نه ایش گۆره جک لرینی آنلادیب، اونلارین یارادیجیلیق لارینا فرصت وئرین.

استراتژی

استراتژی نه دیر

استراتژی معین ایله که لر ایله مقصده چاتمانین یولونو گؤسترن شعورلو و بیلینجلی بیر یول پلانی دیر. استراتژی بیر دوشونمک طرز، قرار وئرمه شابلونو و ساواش صنعتی دیر. گونده لیک فعالیتلرین اوستونه چیخیب، بؤیوک منظره نی و افقدان سونراسینی گؤروب، اوزون مدتلی اوغور قازانماق دیر. اوزاق داکی شئی لری یاخین دای میشیمی گؤروب، یاخین داکی نا اوزاق دان باخماق دیر. پلانلارمانین باشلانقیج نقطه سی دیر. بیر هدفه گندن یولو و پلانی دوشونوب، پلانا صادقی قالماق دیر. قازانارکن بئله پلانی کؤلگه ده بیراخمماق دیر. نه لر ائده جهیمیز قدر نه لر ائتمه به جهیمیزی ده بیلیمک دیر. احتیاج اولمایانی اورتادان قالدیریب، احتیاج اولانا تمرکز ائتمک دیر.

استراتژی سیز ساواش مغلوبیتدن اؤنجه کی بیر گورولتودور. استراتژیسی اولمایان، دشمنین پلانینین بیر پارچاسی اولار. دشمنین پلانینین بیر پارچاسی اولوب، گوجلنمه سینه یول آچانین دا اؤزو محو اولار. استراتژی ده چیخمازا گیرن بیر حرکتی، هیچ بیر ایله، تاکتیک و ائیلیم قورتارا بیلمز، اما ان گوجلو استراتژی ده، اؤزو اؤزونو اجرا ائده بیلمز. هدفه چاتماق اوچون ایسته ییب، اینانیب، خیال اندیب، طرح توکوب، پلانلایب و جسارت له حرکتنه گنجه ملی بیک. بو دنیا بیزه دوشونجه لریمیز قدر ده بیل، حرکتیمیز قدر وئره ر.

پلان و تاکتیک

پلان و تاکتیک لریمیز عمومیت ده "فرصت یاراد، فرصتی یاخالا و فرصتی یؤنت" فرمدا اولمالی دیر. فرصت لر فرقلی شکل لرده یارانا بیلر. بعضا دشمن، بیلمه دن خطا ائدیب بیزه فرصت یارادا بیلر. دشمن خطا ائدی یین ده، سؤزونو کسمه ییب، اونو بیر فرصت کیمی ده ییرلندیرمه لی بیک. آنجاق بونو دا بیلمه لی بیک کی، اومود بیر استراتژی ده بیل، اوتوروب فرصت لری گؤزله مک اولماز. اصیل فرصت لری اوزوموز یارادمالی بیق. بیزیم هر زمان اوچون پلانلاریمیز اولمالی دیر و او پلانلاریمیز اساسیندا، سوسیال گوجوموزه دایاناراق، فرصت لر یارادیب، یؤنتمه لی بیک. استراتژی ده نه قدر گیزی لیک و دقت اؤنم لی دیرسه تاکتیک لرده ده مشاهده و سرعت اؤنم لی دیر. فرصتی یاخالا یب سئل کیمی آخمالی بیق. پلانلاریمیز چنوبک و او یغونلاشان اولسا، هم بیر آدیم مقصده دوغرو ایله ره یه ریک، هم ده گوجوموزو آرتیریرایق. هر زمان اؤزوموز سنجدیغیمیز یئرده، اؤز زامانیمیزدا ساواش مالی بیک. کنترلی

هر زمان اؤز الیمیزده توتوب، دشمنین الینه گنچمه سی نه اجازه وئرمله یییک. بونون اوچون فرصتی ده یرلن دیریب، آکسیایا گنچمه یی بیلدی بیمی ز کیمی، بللی قازانچ لار الده ائتدی ک دن سونرا، گئری چکیل مه یی ده بیلیب، انسانلاریمیزین ان آ ز ضرر گورمه سینه ده دقت ائتمه لی یییک.

یالنیز میللی حکومتین قورولماسی یا دا گونئی آذربایجانلی باغیمسیزلیغا آپاراجاق فرصت لری ده ییل، بیزی بیر آدییم ایلهری آپاراجاق هر فرصتی ده یرلندیرمه لی یییک. هر فرصت دن پلانلادیغیمیز قدر استفاده ائتدی ک دن سونرا دوروب، یئنی بیر حرکت پلانلامالی ییق. اوزاق مسافه لره چتاماق، یاخین مسافه لره گنتمک له ممکن اولار. یوزلرجه فرصتی دوغرو یاخالاییب، دوغرو اداره ائده رک، گوج لنیب، میللی دولتی قورماغا حاضر اولاجاغیق. یئترینجه گوجلو و حاضرلیق لی اولساق، بؤیوک فرصت لر یاخالاییب یا دا یارادیب، بؤیوک حرکت لر باشلادا بیلریک. او زامان، تاریخی ده بییشیم لر، دنیانین گوج دینامیک لرین ده کی ده بییشیم لر، ساواشلار، گؤزله نیل مز حادثه لر، بؤیوک خالق عصیانلاری و بونا بنزر فرصت لری یاخالاییب، الیمیزده کی گوج و پلانلاریمیز ایله، گونئی آذربایجان دا اداره چیلی یی اله گنچیریب، میللی حکومتی قورا بیلریک.

بوتون پلانلاریمیزدا و تاکتیک لریمیزده میللی حرکتیمیزین تابانی نا یعنی سوسیال بازاسی نین قورونماسی نا دقت ائتمه لی یییک. بیر حرکتین تابانی، اونو تمثیل ائدن سیاسی البت و تشکیلات لار طرفیندن دستک لنیب، صاحب چیخیل مازسا، او حرکت و تابان کیتله یه، باشقالاری صاحب چیخار و اؤز ایسته دی ک لری جهت ده یؤن لن دیرر. بوتون فعالیت لریمیزده، تورک دیلینده و آذربایجان ایله ایلگیلی چیخیشلار و شعارلاریمیز اولمالی دیر. میللی حرکتی یانسیدان سمبول لار و بایراق لاری اؤنه چیخارمالی ییق. میللتیمیزین حرکت و آکسیالارینا صاحب چیخیب، ظفرلرینی (نه قدر کیچیک اولورسا اولسون) قید ائدیپ قوتلامالی ییق.

مجادله استراتژی سی

استراتژی لر و پلانلار، اساسا گیزلی اولار و آچیق شکیلده بیان ائتمه یه احتیاج یوخدور. هر میللی تشکیلات و گروه، اؤز امکاملاری چرچیوه سینده اؤزونه مخصوص استراتژی سی نی پلانلاییب، اؤز استراتژی سی اساسیندا حرکت گنچر. آنچاق بورادا گونئی آذربایجانین سوسیال قورولوشو و زامانین شرط لرینه اویغون، عمومی بیر استراتژی دن سوز ائدیریک.

گونئی آذربایجان خالقى آنجاق بؤیوک بیر عصیان لا، گونئی آذربایجان دا یؤنتیمی اؤز الینه گنجیریب میلی دولتینی قوراییلر. بو هدفه چاتماق اوچون یعنی بؤیوک خالق عصیانى باشلادیب، گونئی آذربایجان میلی دولتینی قورماق اوچون، گوجه لن مه لی بیک و گوجوموزون قابناغی دا میللتیمیز یعنی گونئی آذربایجان تورک لری دیر. یالنیز بو پتانسیل گوجو حرکت گنجیره رک، میلی دولتیمیزی قوروب، هدفیمیزه چاتا بیلرک. بونون اوچون هدفیمیز و ایلکه لریمیز دوغرولتوسوندا خالقیمیزی سوسیال، سیاسی و لازم اولورسا نظامی گوجه چئورمه لی بیک. خالقیمیزین بوتون کسیم لرینی، قیز-اوغلان، اوخوموش- اوخومامیش، وارلی- یوخسول، دیندار- لاییک، یاشلی- جوان و ... دئمهدن اوپاندیریب، سفربر ائدیب، بؤیوک عصیانا حاضرلامالی بیق.

گونئی آذربایجان میلی حرکتی بو گونه قدر عمومیتده اوپانیش حرکتی شکلینده مجادله ائدیب دیر. اوپانیش مرحله سی نتیجه سینده بوگون میللتیمیزین چوخونلوغو اوپانیب، تورک لویونون فرقینده اولوب و اؤز هویتینی سئومه یه و مدافعه ائتمه یه باشلاییب دیر. بوندان سونرا، اوپانیش حرکتی نین دوامی ایله برابر، سفربرلیک مرحله سی ده سرعت لن مه لی دیر. گوجلو شبکه لر، تابان اؤرگوت لن مه سی و قورومسال لاش ماق بو مرحله نین ان اساس وظیفه سی دیر. میلی فعاللارین اشتراکی و اداره سی ایله خالقیمیزین فرقلی کسیم لرینده، گیزلی یا دا قانونی گروهلار و تشکیلاتلار اولمالی دیر. صنفي، فرهنگي، سياسي، محیط زیستی و ... قورولوشلار، میلی فعاللارین یاردمی ایله یارادیل مالی دیر یا دا میلی فعاللارین ائتکی سی آلتینا گنج مه لی دیر. میتینگ لر، اعتراضلار، تحصن لار، فرهنگي برنامه لر و دیگر فعالیتلر ایله، هم شبکه لریمیزی گنجیش لن دیرمه لی بیک، هم خالقیمیزی بؤیوک عصیانا حاضرلامالی بیق، هم ده ایرانین گونئی آذربایجان داکی گوجونو توکت مه لی بیک.

استراتژی نین اجرایی و باشاری سی اوچون دوغرو پولیتیکالار بلیر لن مه لی دیر. استراتژیک پولیتیکالار، پلان لاریمیزین و تاکتیک لریمیزین باشاری اولچوسو و شابلونودور. پلانلاریمیز، نه قدر پولیتیکالاریمیز دوغرولتوسوندا ایله ره مه یه سبب اولموش سا او قدر باشاریلی سایلی لار. گونئی آذربایجان میلی حرکتی نین بعضی اؤنم لی استراتژیک پولیتیکالاری بونلاردیر:

1. میللتی سیاسی لش دیر و حرکت گنجیر

ایران حکومت لری بیلینج لی اولراق خالقیمیزا سیاستین فیداسیز و تهلهک لی اولدوغونو تلقین اندیب، اولناری پاسیولش دیرمه چالیشیر. بونون اوچون، میلی حرکتیمیزین اساس استراتژی لرین دن بیری میلی اکتیو سیاسته و سیاسی فعالیتیه چکمک دیر. میلیتین قلبینی و ذهنینی قازانیب، اولناری حرکتین فعاللاری و یارادانلاری ائتمه لی بیک. تاکتیک لریمیز نه قدر خالقیمیزی سیاسی لش دیریب، میلی مجادله یه جذب ائدیب، حرکتیه گنجیرسه، او قدر باشاریلی ساییلار.

2. ایرانچیلیغین ایدئولوژیک نفوذونو چوروت

"ایران دا یاشایان خالقلار بیر میلیت دیر، اورتاق سرنوشتی وار و اورتاق دیل لری فارسجادیر" بو جمله، ایران چی لیک تئوریسینین اساسی دیر. بو یانلیش تئوری، گونئی آذربایجانین استعمار اولونماسی و مستعمره کیمی قالماسی نین اساس سببی دیر. میلیتیمیز بو تئوری یه ایناندیغی مدت جه، حرکتیه گنجمز و اؤز سرنوشتینی اؤز الینه آماز. بونون اوچون بو تئورینین یانلیش اولدوغونو خالقیمیزا گؤستریب، چورودوب، بوخ ائتمه لی بیک. فرق لی تاکتیک لر ایله گونئی آذربایجانین فرق لی میلیت اولدوغونو، ایرانین باشقا خالقلاری ایله عینی چیخارلاری و سرنوشتی اولمادیغینی، حتی راسیست ایران دولت چی لی بی تورک و آذربایجان دشمنی اولدوغونو گؤسترمه لی بیک. میلیتیمیزین فارس دیلینه ده ییل، اؤز تورک دیلی و مدنیتیه باغلی اولدوغونو گؤستریب هر کسه اینان دیرمالی بیق. فعاللیریمیز دا بو تئوری نین دوغرولتوسون دا قورولموش ائیلیم و بیرلیک لردن اوزاق دورمالی دیر.

3. ایرانین اتوریتیه سینی گونئی آذربایجاندا ضعیفلت

استثمارچی دولت لر مستعمره لرینی، یئرلی انسانلارین یاردیمی ایله اداره ائدرلر. بونون اوچون، استثمارچی نین پروپاگاندا سینا اینان میش، اونو گوجل و عدالتلی بیلن یئرلی انسانلاری سئچیب، اولارین واسطه سی ایله اتوریتیه لرینی تامین ائدرلر. هر باشاریلی میلی حرکتینین ان اؤنم لی استراتژی لرین دن بیری، اؤزوندن اولان آما دشمنه چالیشان اولادلارینین اوزه رین ده دشمنین حاکمیتینی ضعیفلت مک و میلی حرکتینه جذب ائتمک، یا دا ان آزیندان استثمارچی یا اولان باغلی لیغینی و اطاعتینی آزالتماق دیر. ایرانین دولت ارگان لارین دا چالیشان، گونئی آذربایجان لی بوروکرات لار، کارمندلر، معلم لر، مدیرلر، پلیس لر، سپاهی لر، ارتشی لر، قاضی لر، اطلاعات مامورلاری و باشقالاریندا، نه قدر ایران باغی آزالیب،

میلهی دوشونجه چوخالسا، ایرانین گونئی آذربایجانى اداره ائتمه قابلیتی او قدر آزالاجاق و اوتوریتیه سی ده او قدر ضعیفله یه جک.

4. دیپلماسی ایله حرکتیه مشروعیت و دستک قازان

بو استراتژی اساسیندا، میلهی حرکتیمیزین مشروعیتی، رسمیتیه تانینماسی و اؤنونون آچیل ماسی نا چالیش مالی بیق. بونون اوچون خارجی اؤلکه لر، بین الخالق تشکیلاتلار و انسان حق لرینی مدافعه ائدن گروه لارلا ارتباطا گئجه له لی بیق. لوبی جیل یک، کامپانیالار، مطبوعات بولتن لری، مدیا راپورتاژلاری و سوسیال مدیا داغالاری ایله، بین الخالق آلی نی گونئی آذربایجان خیرینه شکیل لن دیرمه لی بیق. گونئی آذربایجان دا انسان حق لری احلالی و باشقا جنایت لر ایله ایلگی لی، بین الخالق محکمه لره و قوروملارا باش وورمالی بیق. و ...

5. مجازی دنیا دا حاکمیتی نی قور

سوسیال مدیا و مجازی دنیا، دولت لرین حاکمیتی آلتیندا اولمایان تک محیط دیر. بو گون انسانلار بین ارتباطی، بیلگی پایلاشیمی و سوسیال لشمه سی نین چوخو بو اورتاملاردا اولور. سوسیال مدیا و مجازی دنیا، ان بؤیوک آوانتاژیمیز اولمالی دیر. خالقیمیزین ایچریک احتیاجلاری، میلهی حرکتین کانلاریندا تامین ائدیل مه لیدیر. سوسیال مدیا شبکه لری ایله خالقیمیزی شبکه لن دیریپ، اؤرگوت له مه لی بیق. گونئی آذربایجان دا گوندم، میلهی حرکتین کانال لاری ایله اداره اولونمالی دیر.